

**Nobat Diraja Kedah serikan istiadat
Utusan Online
08 April, 2012
Oleh ASSIM HASSAN**

KUALA LUMPUR 7 April - Alunan muzik daripada alat kesenian nobat bakal menjadi satu daripada komponen penting pada upacara istiadat pertabalan Yang di-Pertuan Agong ke-14 pada 11 April ini.

Nobat yang merupakan alat kesenian tradisional dari Kedah itu dipilih memandangkan Yang di-Pertuan Agong ke-14 iaitu Tuanku Abdul Halim Mu'adzam Shah dan Raja Permaisuri Agong, Tuanku Haminah merupakan raja dari negeri Jelapang Padi tersebut.

Menurut Datuk Paduka Maharaja Lela, Azuan Effendy Zairakithnaini, walaupun istiadat pertabalan Yang di-Pertuan Agong adalah majlis rasmi yang diadakan setiap lima tahun sekali namun ia mempunyai sedikit perbezaan setiap kali diadakan.

"Memandangkan kali ini melibatkan giliran Yang di-Pertuan Agong dari Kedah, jadi ada unsur-unsur atau ciri-ciri negeri itu yang turut diambil kira pada majlis pertabalan.

"Bagi istiadat pertabalan Seri Paduka Baginda ini, pihak istana telah menjemput pasukan nobat diraja negeri Kedah yang akan memainkan alunan muzik nobat dan lagu-lagu yang signifikan dengan adat istiadat pertabalan," katanya ketika ditemui *Mingguan Malaysia* di sini hari ini.

Menurut Azuan Effendy, alunan muzik nobat adalah sesuatu yang unik dan eksklusif serta tidak dimainkan pada setiap majlis.

Sebaliknya kata beliau, alunan muzik itu hanya dimainkan pada majlis tertentu yang mempunyai ketinggian darjah seperti istiadat pertabalan.

Tambahnya, istiadat pertabalan juga masih mengekalkan tradisi dari segi perjalanan aturan dan protokol meskipun di sebalik peredaran masa dan zaman yang lebih moden hari ini.

"Alat kebesaran yang dibawa pada istiadat pertabalan itu juga sama dengan pertabalan Yang di-Pertuan Agong pertama.

"Antara alat kebesaran yang akan dibawa oleh Datuk Maharaja Lela dan panglima-panglima itu adalah Cogan Alam dan Cogan Agama iaitu tongkat-tongkat perak yang merupakan sebahagian daripada alat kebesaran diraja serta menjadi lambang kebesaran kerajaan," katanya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0408&pub=Utusan_Malaysia&sec=Dalam_Negeri&pg=dn_03.htm